

Semeton Cakepan Sucine - Confession Scriptures

Ezra 9:7 Ngawit saking paraleluur titiange kantos rauh mangkin, agung pisan kiwangan titiange. Malantaran dosan titiange, titiang sareng sami, pararatu miyah parapanditan titiange sampun serahang Palungguh IRatu ring pararatu sunantarane, tur titiang kapunggal, kajarah miyah katawan. Titiang kanistayang ring arepan jadmane katah sakadi sane mamargi sane mangkin.

Ezra 9:13 Sasampune titiang muponin palan dosa miyah kiwangan titiange sane ageng punika, Palungguh IRatu, Widin titiange nenten nyisipang titiang anut ring dosan titiange, nanging kantun nglugrain titiang urip.

Nehemia 9:1/2 Ring tanggal patlikur ring sasihe punika, rakyat Israele pada mapupul jaga mapuasa buat nyinahang kasedihannyane malantaran dosadosannyane. Ipun sampun pada malasang dewek saking parawong sunantara. Ipun pada nganggen pangangge kaduhkitan tur nyambehin sirahnyane antuk abu makacihna nandang kaduhkitan. Sasampune punika, ipun tumuli pada majujuk tur ngangkenin dosa-dosanipune miyah dosadosan leluurnyane sane sampun kardi ipun.

Kidung 24:3,4 Sapasirake sane wenang mamargi ngungsi Gunung Ida Sang Hyang Widi Wasa? Sapasirake sane kalugra ngranjing ring Perhyangan Agung Idane sane suci? 4 Wantah jadmane sane suci laksana miyah pepinehipune, sane nenten nyumbah arca-arca, wiadin nenten lompong ring pasubaya.

Kidung 73:13 Dadosipun tan paguna yening titiang ngamanggehang kasucion miyah nenten sruron ring paindikan sane madosa.

Yesaya 59:2 Sane ngawinang Ida tan kayun nulungin semeton punika wantah dosan semetone. Dosa-dosan semetone sane ngedohang semeton saking Ida Sang Hyang Widi Wasa rikalaning semeton ngindayang ngaturang bakti ring Ida.

Yesaya 64:6 Yadiastu pakardin titiange sane pinih becik punika taler sampun keni weci. Riantuk dosan titiange, titiang waluya kadi daune sane layu sane kampehang antuk angin.

Yeremia 5:25 Nanging sakancan unduke ento kacadelin baan dosan kitane.

Hosea 13:8 Ulun lakar nyarap kita buka beruange ane kelangan panakne, tur lakar mesbes tangkah kitane. Waluya buka singane, ditu Ulun lakar nyagrep kita jalan mula, tur Ulun lakar mukang-mukang kita buka buron

alasane.

Daniel 9:8,9 Duh Ratu Sang Hyang Widi Wasa, pararatun titiange, parapamrentah miyah leluur titiange sampun nglaksanayang paindikan sane ngawinang kimud tur madosa ring Palungguh IRatu. 9 Palungguh IRatu kalintang kawelas arsan tur ledang ngampurayang, yadiastu titiang sampun brontak nglawan Palungguh IRatu.

Markus 9:24 Reramannyane raris nyerit: "Inggih Guru titiang pracaya! Nanging kapracayan titiange kalintang lemet, suecaninja titiang, kuatangja kapracayan titiange!"

Lukas 11:2 Pasaur Ida Hyang Yesus ring dane: "Yening cening ngastawa, kene abete: Inggih Aji, parab Palungguh Aji mangda kasuciang. Pamrentahan Palungguh Aji dumadak rauh. (Matius 6:10)

Yohanes 14:6 Pasaur Idane ring dane: "Guru ene ane mimpin manusane ka ajeng Ida Sang Hyang Widi Wasa, tur Guru ane mawak kasujatian muah urip. Tusing ada anak ane nyidayang nangkil di ajeng Ida Sang Aji sajabaning malantaran Guru.

Yohanes 17:15 Titiang boyaja mapinunas mangda IRatu ngambil ipun sami saking jagate, nanging mangda IRatu nyayubin ipun saking I Jaat.

Yakobus 4:8 Tangkilinja Ida Sang Hyang Widi Wasa, tur Ida pacang rauh nganampekin parasemeton. Bresihinja tangane, ih anak sane madosa! Tur eningangja kayune ih anak sane mapi-mapi!

Roma 6:12-14 Duaning punika, dosa tan patut malih ngreh sikian semetone sane sekala puniki, mangda semeton sampunang malih ninutin sapakitannyane. 13 Sampunangja semeton nyerahang salah tunggal anggotan ragan semetone ring dosa buat kanggen prabot nglaksanayang paindikan-paindikan sane corah. Tungkalikanipun, aturangja sikian semetone ring Ida Sang Hyang Widi Wasa, sakadi anak sane sampun kauripang saking pantaran anak padem, tur suksrahangja sikian semetone ring Ida, mangda kanggen prabot buat nglaksanayang paindikan-paindikan sane patut. 14 Sampunangja idosa kantos ngreh semeton; santukan semeton nenten kantun kareh antuk Cakepan Torate, nanging antuk sih pasuecan Ida Sang Hyang Widi Wasa.

Ibrani 9:28 Kadi asapunika taler ngeniang indik Ida Sang Kristus, Ida sampun katurang dados aturan wantah apisan buat mrastayang dosa-dosan anake akeh. Ida pacang mapakantenang raga sane kaping kalihipun nentenja buat mrastayang dosa, nanging buat ngrahayuang anake sane nyantosang rauh Idane.

1 Yohanes 1:9 Nanging yening iraga mariangken dosa-dosan iragane ring ayun Ida Sang Hyang Widi Wasa, Ida pacang satia ring janjin Idane tur adil. Ida pacang ngampurayang dosa-dosan iragane tur nyuciang iraga saking saluiring kacorahan iragane.

Kampurayang Cakepan Sucine - Forgiveness Scriptures

Matius 6:12-15 Ampurayangja iwang titiange, sakadi titiang ngaksamayang anake sane sampun maiwang ring titiang. 13 Maliha sampunang titiang kabakta ring genah gegodane, nanging bebasangja titiang saking I Jaat. [Santukan Palungguh Aji sane nuwenang pamrentahan, kakuasaan miwah kaluihane langgeng salami-laminipun. Amin.] 14 Sawireh yen cening ngampurayang kapelihan sesaman ceninge, Ajin ceninge ane di suargan masih ngampurayang pelih ceninge. 15 Nanging yen cening tuara nyak ngaksamayang kapelihan sesaman ceninge, Ajin ceninge ko tuara kayun ngampurayang kapelihan ceninge.”

Matius 18:21,22 Dane Petrus raris tangkil ring ajeng Ida Hyang Yesus tur matur asapuniki: “Inggih Guru, ping kudake patutipun titiang ngaksamayang nyaman titiange sane mapakardi iwang ring titiang? Punapike ping pitu?” 22 Pangandikan Ida Hyang Yesus: “Guru nuturin cening, dongja kanti ping pitu dogen, nanging kanti ping pitung dasa ping pitu.

Matius 18:35 Irika Ida Hyang Yesus muputang baos Idane, antuk pangandika sapuniki: “Nah buka keto masih Ajin Gurune di suargan, marep teken cening, yen cening tusing ngaksamayang kapelihan nyaman ceninge kanti nekeng ati.”

Markus 11:25,26 Buina dinuju cening ngastawa, saget ada rasa sebet di keneh ceninge teken anak, aksamayang malu pelih anake ento, apanga Ajin ceninge ane di suargan ledang ngampurayang dosan ceninge. [26 Nanging yen cening tusing ngaksamayang pelih anak, Ajin ceninge ane di suargan masih tusing bakal ngampurayang dosa-dosan ceninge.]”

Lukas 6:37 “Eda pesan cening nepasin anak, apanga cening masih tusing katepasin baan Ida Sang Hyang Widi Wasa. Buina eda pesan cening melihang anak, apanga cening masih tusing kasisipang baan Ida Sang Hyang Widi Wasa. Ampurayangja pelih anake, apanga Ida Sang Hyang Widi Wasa masih ngampurayang cening.

Lukas 11:4 Ampurayangja saananing dosa-dosan titiange, santukan titiang taler ngampurayang sakancan anake sane mapakardi iwang ring titiang. Tur sampunangja titiang kabakta ring sajeroning gegodan.”

Lukas 17:3,4 Yatnainja deweck ceninge! Yening nyaman ceninge madosa, glemekinja ia. Tur yen ia ngidih pangampura, ampurayangja ia. 4 Yen diawaine ia pelih kanti ping pitu marep teken cening, tur sabilang ia pelih ia teka teken cening saha ngucap kene: ‘Tiang ngidih sinampura,’ cening

patut ngampurayang ia.”

Lukas 23:34 Ida Hyang Yesus matur, sapuniki: “Duh Aji, ampurayangja ipun sareng sami, santukan ipun nenten uning ring paindikan sane laksanayang ipun.” Busanan Idane raris kadum nganggen undi.

Pamargin Parautusan 8:22 Sehinja tur kutangja pepineh semetone sane corah punika, tur ngastawaja ring Ida Sang Panembahan, mangdane Ida ledang ngampurayang pepineh semetone sane kadi asapunika.

Roma 4:7 “Bagia pesan anake ane kampurayang kapelihannyane baan Ida Sang Hyang Widi Wasa, tur ane kangkebin dosa-dosannya;

Epesus 1:7 Santukan malantaran sedan Ida Sang Kristus, iraga sampun kabebasang, inggih punika sakancan dosan iragane kampurayang. Ambate ageng sih pasuecan Ida Sang Hyang Widi Wasa,

Epesus 4:32 Tungkalikanipun, semeton patut ajer miwah darma sadu, samaliha saling aksamayang, sakadi Ida Sang Hyang Widi Wasa sampun ngampurayang semeton sajeroning Ida Sang Kristus.

Kolose 1:14 sane sampun mebasang iraga, inggih punika sane sampun ngampurayang dosa-dosan iragane.

Kolose 2:13-15 Sane riin semeton padem sacara rohani malantaran dosa miwah malantaran semeton boyo bangsa Yahudi, saha urip nyapa kadi aku. Nanging sane mangkin Ida Sang Hyang Widi Wasa sampun ngurip semeton sajeroning Ida Sang Kristus. Ida sampun ngampurayang sakancan dosan iragane. 14 Surat utang iragane sane nyengkalen iraga, rauhing pidabdabnyane, sane nalih iraga punika, sampun sirnayang Ida malantaran sedan Idane ring salibe. 15 Ring salibe punika Ida Sang Kristus sampun mebasang raga saking kawisesan kakuasan sane tan katon. Ida sampun nadossang ipun pabalih-balihan ring arepan anake akeh rikala Ida maid tur nadossang ipun bebandan, santukan Ida sampun nyeneng.

1 Yohanes 1:9 Nanging yening iraga mariangken dosa-dosan iragane ring ayun Ida Sang Hyang Widi Wasa, Ida pacang satia ring janjin Idane tur adil. Ida pacang ngampurayang dosa-dosan iragane tur nyuciang iraga saking saluiring kacorahan iragane.

1 Yohanes 2:12 Duh parasemeton sane pinaka dados pianak tiange, tiang nyurat ring semeton, santukan dosa-dosan semetone sampun kampurayang malantaran parab Ida Sang Kristus.